

Das sie zu lang ließ leben gott  
Do sie jr sün an schowten dot!  
Wer Priamus gestorben vor  
Vnd het gelebt nit so vil jor  
Sah er nit leid so jämerlich  
An sün / frow / döchter / stat / vnd rich /  
Wann Mythridates / vnd Marius /  
Cresus / vnd der groß Pompeyus  
Nit werent worden also alt  
Werent sie dott in grossen gwalt!  
Wer hübscheyt im / vnd synem Eynd  
Wünschet / der sucht vrsach zu sünd  
Wer Helena nit gewesen schon  
Paris het sie in Eriechen gelon!  
Wer häslich gsyn Lucrecia  
Sie wer geschmächet nit also!  
Hett Syna kropff vnd hofer ghan  
Sychem hett sie gelossen gan!  
Es ist gar selten das man treit  
Bynander schonheyt vnd küscheyt!  
Vor vß / die hübschen hansen nun  
Sie went all bübery yetz tün  
Vnd werden doch gefellet dick  
Das man sie sticht im narren strick!  
Mancher wünscht / hüser / frow / vnd Eynd  
Oder das er vil gulden fynd  
Vnd des glich goückels / das gott wol  
Erkennt / wie es geroten sol  
Sar umb gibt er vns ettwan nüt  
Vnd das er gibt / nymbt er zu zyt

